



TEKS UCAPAN

**YB TUAN HAJI KHALID BIN ABD. SAMAD
MENTERI WILAYAH PERSEKUTUAN**

***BIODEGRADABLE FUN RUN 2020*
DAN KEMPEN KIBAR BENDERA
WILAYAH PERSEKUTUAN**

19 JANUARI 2020 (AHAD) / 7.00 PAGI

**DATARAN DBKL, JALAN RAJA LAUT
KUALA LUMPUR**

Bismillahirrahmanirrahim

Assalamualaikum

Warahmatullahi

Wabarakatuh dan Salam Sejahtera

**[senarai saluti akan dimaklumkan
kemudian]**

1. Alhamdulillah, marilah kita bersama-sama memanjatkan kesyukuran ke hadrat Allah s.w.t, kerana dengan izin dan limpah kurniaNya jua, kita dapat bersama-sama berkumpul pada pagi ini untuk menjayakan **Program “*Biodegradable Fun Run 2020*”** dan **Kempen Kibar Bendera Wilayah Persekutuan** bersempena dengan

Kuala Lumpur *Car Free Morning* yang diadakan 2 kali sebulan.

2. Saya mengambil kesempatan ini untuk merakamkan ucapan penghargaan dan terima kasih kepada semua peserta yang menyertai program pada hari ini. Syabas dan tahniah diucapkan kepada para peserta Program "*Biodegradable Fun Run 2020*" dan Kempen Kibar Bendera Wilayah Persekutuan yang sungguh bersemangat pada pagi ini. Difahamkan penyertaan pada hari ini seramai 3,000 orang. Komitmen anda semua amatlah dihargai.

3. Kementerian Wilayah Persekutuan (KWP), menerusi **Teras 5** iaitu **Persekitaran Hijau**, memberi fokus utama terhadap inisiatif pelaksanaan penggunaan produk biodegradasi di seluruh Wilayah Persekutuan, meliputi Kuala Lumpur, Putrajaya dan Labuan. Kementerian Wilayah Persekutuan mensasarkan penggunaan penuh 100% biodegradasi pada tahun 2022 selaras dengan *Malaysia's Roadmap Towards Zero Single-use Plastics 2018-2030*. Pengenaan caj 20 sen bagi plastik biodegradasi dan larangan penggunaan *straw* plastik juga telah dikuatkuasakan di Wilayah Persekutuan pada 1 Januari 2020.

Tuan-tuan dan puan-puan sekalian,

- 4. Program “*Biodegradable Fun Run 2020*”** ini merupakan acara larian 7 Kilometer yang berkonsepkan penggunaan produk biodegradasi yang mana acara larian ini turut disertai oleh seisi keluarga tanpa sebarang batasan umur. Tujuan program ini diadakan adalah untuk menambahkan hebahan dan memberi kesedaran kepada orang ramai berkaitan penggunaan produk biodegradasi di Wilayah Persekutuan dan larangan penggunaan plastik sekali guna, *straw* plastik dan polistirena. Program-program kesedaran melalui

program *Communication, Education & Public Awareness* (CEPA) di Wilayah Persekutuan meliputi Wilayah Persekutuan Kuala Lumpur, Putrajaya dan Labuan ke arah pencapaian 100% penggunaan produk biodegradasi pada tahun 2022 sentiasa diadakan dan diteruskan.

5. Pada hari ini juga, kementerian melancarkan Kempen Kibar Bendera Wilayah Persekutuan yang merupakan program *kick-off* kepada Sambutan Hari Wilayah Persekutuan yang akan disambut pada 1 Februari nanti. Matlamat utama kempen ini adalah untuk menambahkan perasaan cinta kepada

Wilayah Persekutuan dalam kalangan warganya di samping menyemarakkan acara dan program/ Sambutan Hari Wilayah Persekutuan 2020.

6. Saya ingin mengambil kesempatan ini untuk menyeru seluruh warga Wilayah Persekutuan sama ada di Kuala Lumpur, Putrajaya mahupun Labuan untuk sama-sama mengibarkan Bendera Wilayah Persekutuan di semua premis termasuk di rumah masing – masing sebagai sokongan dan rasa sayang terhadap Wilayah Persekutuan. Sokongan terhadap kempen ini juga akan menyerlahkan imej masyarakat Wilayah

Persekutuan yang harmoni, prihatin, maju dan sejahtera.

7. Sebelum mengakhiri ucapan, saya sekali lagi ingin mengucapkan setinggi-tinggi penghargaan kepada jawatankuasa dan urusetia Program “***Biodegradable Fun Run 2020***” dan **Kempen Kibar Bendera Wilayah Persekutuan** yang memberikan sokongan dan komitmen yang tinggi dalam menjayakan program pada hari ini. Diharapkan komitmen tinggi dari semua pihak dalam merelisasikan 100 peratus penggunaan produk biodegradasi dan *zero* straw plastik di Wilayah Persekutuan tercapai.

8. Akhir kata, dengan lafaz Bismillahirrahmanirrahim, saya dengan ini **merasmikan Program “*Biodegradable Fun Run 2020*” dan Kempen Kibar Bendera Wilayah Persekutuan 2020.**

Sekian, Wabillahi Taufik Wal hidayah,
Wassalamualaikum Warrahmatullahi
Wabarakatuh.